

每週經課朗誦經文(巴克禮台語漢字)2014/11/30

共同經課 - 1 以賽亞書六十四章一節~九節

1 願你離開天來降臨；互諸個山振動佇你的面前——2 親像火燒乾柴，親像火互水滾，互你的對敵知你的名，互列國佇你的面前愕愕！3 你曾行通驚的事阮所無拍算。彼時你降臨，諸個山振動佇你的面前。4 對古早以來，人未曾聽見、耳孔未曾聽見、目睷未曾看見，佇你以外有甚麼上帝為著聽候伊的人行代誌。5 你迎接彼個歡喜行義、及記念你的道路的人；看啊，你曾受氣，阮曾犯罪；親像按呢已經久，阮猶會得著救嗎？6 阮攏親像無清氣的人；所有的義攏親像污穢的衫。阮攏親像樹葉漸漸乾去；阮的罪過親像風給阮吹去。7 閣無人求叫你的名；無人出力擒住你。因為你掩面毋看阮，互阮因為阮的罪過致到消無。8 耶和華啊，今你猶原是阮的父！阮是土，你是燒磁師傅；阮攏是你的手所造者。9 耶和華啊，你毋通大受氣，亦毋通永遠記念罪過。求你俯落來看，阮攏是你的百姓。

共同經課 - 2 詩篇八十篇一節~七節，十七節~十九節

1 〔亞薩的詩，交互樂官。調用做干證的百合花。〕以色列的牧者啊，導約瑟親像羊群者，求你俯耳孔聽！坐佇基路兵的頂面者，求你發出你的光！2 佇以法蓮、便雅憫、瑪拿西的面前，展出你的權能，來救阮。3 上帝啊，互阮倒轉，互你的面發出光，阮就得著救！4 萬軍的上帝——耶和華啊，你向你的百姓的祈禱發出受氣，欲偌久啊？5 你用目屎做食物互in食，閣量多多目屎互in飲。6 你互隔壁國因為阮來相爭；阮的對敵相及啲笑。7 萬軍的上帝啊，互阮倒轉，互你的面發出光，阮就得著救！17 願你的手按佇你正旁的人，就是你為家己所堅固的人子。18 按呢，阮就無倒退離開你；求你互阮得著活，阮就欲求叫你的名。19 萬軍的上帝——耶和華啊，互阮倒轉，互你的面發出光，阮就得著救！

共同經課 - 3 哥林多前書一章三節~九節

3 願恁對咱的父上帝及主耶穌基督得著恩典、平安。4 我常常替恁感謝我的上帝，是為著上帝的恩典佇耶穌基督曾賞賜恁的；5 因為恁惦佇伊逐項代誌富足，口才、智識無毋齊備，6 親像基督的干證，得著堅固佇恁的中間，7 致到恁佇諸個恩賜無一項無夠額，來聽候咱的主耶穌基督的顯現。8 伊也欲堅固恁到路尾，佇咱的主耶穌基督的日無通嫌。9 上帝是信實，恁對伊受召，來及伊的子——咱的主耶穌基督結聯。

共同經課 - 4 馬可福音十三章二十四節~三十七節

24 「當許個日，彼個患難的了後，日欲黑暗，月無出伊的光，25 星對天磕落，佇天裡的象欲振動。26 彼時，欲看見人子用大權能及榮光，佇雲中臨到。27 彼時伊欲差伊的天使，對四方，聚集伊所揀的百姓，對地極到天邊。」28 「恁著學無花果樹此個譬喻：當枝軟葉發的時，恁就知夏天近啦。29 按呢，恁看諸個事，著知是近，到門口啦。30 我實在給恁講，此世代猶未過去，到諸個代誌攏成。31 天地欲廢無，我的話袂廢無。」32 「若是論彼日，彼時，人毋知，佇天裡的天使也毋知，子也毋知，獨獨父知伊。33 著謹慎，警醒來祈禱，因為恁毋知彼個期是佇甚麼時。34 是親像一人離開伊的家，去出外，將權交代伊諸個奴僕，有派工互逐人做，閣吩咐顧門者著張持。35 所以，恁著張持；因為恁毋知恁的主甚麼時欲來，或是日暗，或是半暝，或是雞啼，或是天光早；36 驚了伊忽然來，抵著恁啲暍。37 我所給恁講的，也給眾人講：著張持！」